

西
巡
大
事
記

西巡大事記卷一

光緒二十六年七月二十一日至八月二十四日

目錄

崑岡等奏時局危迫請飭慶親王回京與各使速定大計摺

八月初二日

崑岡等奏洋兵入城後各處均無恙片

初二日

榮祿等奏率各軍退駐保定摺

初三日

李廷簫奏晉省去敵甚近亟宜嚴密設防摺

初六日

軍機處咨晉撫奉諭命赫德借船接李鴻章來京文

初六日

李鴻章奏陳時局變遷急籌補救摺

初七日

李鴻章奏請旨聲明拳匪罪惡飭各路援兵認真剿辦片

初七日

榮祿崇綺奏擬嚴密防堵獲鹿並派軍解餉赴行在摺

初七日

榮祿崇綺奏擬親往獲鹿佈置片初七日

榮祿崇綺奏收集隊伍以圖規復片初七日

馮子材致樞垣遵旨由滇帶兵北上電初八日

崑岡等奏報各國使臣等入宮瞻觀情形摺十一日

劉坤一等奏商派大員率隊扈蹕並節制各援軍摺十一日

劉坤一奏敬陳下悃摺十一日

魏光燾端方奏請乘輿移幸西安以遠寇氛摺十二日

廷雍奏聞鑾輿西巡專摺敬慰摺十二日

廷雍奏請迅派知兵大員總統各軍片十二日

榮祿奏覆陳布置直晉防務未能參與和議摺十三日

榮祿奏尙書崇綺殉節片十三日

李鴻章等奏款局急宜挽救不可再失事機摺十四日

李鴻章等奏請下詔罪己並添派王大臣主持和議片十四日

李鴻章等奏添設電線並請早日回鑾片十四日

端方致樞垣繕呈李鴻章奏請兩宮回鑾電十四日

徐郁等奏陳洋兵入城後情形摺十五日

榮祿奏遵旨馳回保定會辦議款摺十八日

李鴻章奏款局須速開議遲則生變電十九日

端方致樞垣繕呈李鴻章報使俄楊儒奏請回鑾電十九日

廷雍奏拳教相仇現復各聚請旨嚴飭一律解散摺二十一日

西巡大事記卷一

男希隱亮編

黃巖叟夫王彥威輯

孫孝章敬立校

光緒二十六年七月二十一日辰初刻

皇上聞洋兵入城之警倉卒奉皇太后啟鑾巡幸山西出西便門至頤和園小坐遂行七十里傍晚大雨駐蹕貫市鎮之清真寺皇太后御輔國公載瀾車載瀾參乘皇上御左翼總兵英年車英年參乘皇后瑾妃大阿哥名溥儀從隨扈者自載瀾英年外喀爾喀郡王那彥圖貝子溥倫公定昌志鈞軍機大臣尙書趙舒翹侍郎溥興六人

二十二日 行經南口出居庸關七十里駐蹕懷來縣之岔

道鎮

皇上奉皇太后初定十七日啟鑾先一日有旨派榮祿徐桐剛毅崇綺留京辦事剛毅不奉旨於本日詣岔道行在請安皇上下大怒飭令回京皇太后以爲言始令隨扈

軍機大臣兵部尙書剛毅詣行在請安並獻皇太后便衣一襲

懷來縣知縣吳永來迎駕以藍輿進皇太后皇上御駝轎貫市李家李名

光緒業與橋者所進也皇后大阿哥瑾妃亦由李家各備駝轎以次前進

二十三日 辰初刻大雨行二十里抵榆林驛進饘行四十

里駐蹕懷來縣城

直隸口北道鍾培宣化府知府李肇南宣化縣知縣陳本來迎駕皇太后皇上始乘黃轎皇后瑾妃大阿哥皆乘藍轎

旨傳諭懷來縣知縣吳永行在隨扈兵丁炎天奔走辛苦異常著懷來縣無論何款籌湊若干先行酌給兵餉勿致枵腹並傳諭下站一律照辦

旨寄護理山西巡撫布政使李廷簫朕奉慈輿昨日已抵居庸關向山西進發著李廷簫速來迎駕山西巡撫毓賢無論行抵何處著李廷簫傳旨迅即帶兵扼守固關以防後路六百里交宣化縣陳本發

上諭甘肅布政使岑春煊首先帶兵趨赴行在著卽督辦前路糧臺事務

上諭寄大學士榮祿徐桐禮部尙書崇綺均着留京辦事所有京城軍務及地方要務隨時奏聞以慰廩系其應行隨扈人員催令速赴行在

由堂交奇克仲布差遞二十九日折回未達三十日重繕交何秉賢差遞

旨寄甘肅提督董福祥着董福祥親帶馬隊趕赴行在隨扈步兵各營着扼守獲鹿以防直晉交界該提督威望素著務須聞命卽行朕心翹盼之至

旨寄河南巡撫裕長護理山西巡撫李廷簫現在隨扈官兵衆多餉項不繼河南應解京餉着裕長提前趕解山西應解京餉及河東道部撥新餉着李廷簫設法速解行在

以上各封借用懷來縣印

二十四日 駐蹕懷來縣城自本日起軍機處始有印

軍機大臣戶部尙書王文韶奔赴行在奉旨召見呈進軍機處關防

上諭朕奉慈輿西幸隨扈各營官弁及地方各官理宜嚴行約束兵丁及閒雜人等不准喧譁亂行如有兵丁在附近無故擅行放鎗定以軍法從事至潰軍散勇絡繹於途著總理行營處傳知各營自行酌量收集給餉再整軍伍如有不法之徒混行搶掠即就地懲辦其不願歸營並未爲匪者收其鎗械令其回籍時局如此想我軍民各具天良必能

共體此意也

交馬玉崑孫萬林岑春煊奇克伸布沿途先行出示札縣轉行設路

交片直隸提督馬玉崑等本日軍機大臣面奉諭旨居庸關爲京師門戶關繫最要着馬玉崑速派得力數營駐紮居庸南口一帶扼守險要除隨扈王公大小官員太監人等及各家眷屬准其放行外務須稽查

散勇及形迹可疑者不准放進一人所帶鎗械必須扣留違者軍法從事並着馬玉崑揀選曉事勇敢員弁分帶數營先在駕前兩三站內輪流防守截堵前竄散勇勿任擄掠此二事責任綦重如所派營弁虛應故事均惟該提督是問着派岑春煊沿途護送至隨駕官兵糧草需用最急着派俞啟元吳永先行前往會同地方官預爲籌辦萬勿貽誤

旨寄岑春煊等朕西幸太原隨扈官兵甚多着岑春煊馬玉崑孫萬林奇克伸布等嚴束兵丁收集潰勇並到處出示勿令滋事

二十五日 行五十里駐蹕懷來縣之沙城堡

旨寄留京辦事大臣榮祿徐桐崇綺前因英國寶使有各使在京和局較易轉圜之語並據函訂王大臣等於十九日往議嗣因事務倥傯未

及前往遠有二十一日之變現在局勢大壞祇此一線可以援爲商議之據着榮祿徐桐崇綺彼此熟商迅速設法辦理是所至盼

六百里由縣遞至保定交

廷雍轉
遞京城

旨寄護理直督布政使廷雍現在隨扈官兵及行在日用所需甚屬浩繁所有東南各省京餉著該護督傳知解餉官員一律運至保定存庫並設法源源運解行在

交片宣化鎮總兵何乘鰲軍機大臣面奉諭旨居庸關地勢險要昨已命馬玉崑留軍扼守並着何乘鰲將所部駐紮保定之四營調回扼紮沿邊豬龍口一帶並收集散勇修理礮臺以壯聲援而杜窺伺

上諭寄全權大臣大學士直隸總督李鴻章七月二十一日洋兵猛攻

入城圖撲宮禁勢甚危險朕不得已恭奉皇太后慈輿暫行西幸此次
釁起民教相關朝廷辦理爲難情形已歷次備具國書詳告各國彼方
以代除莠民爲辭謂於國家並無他意而似此舉動殊屬不顧邦交未
符原議且中國於駐京各使臣始終委曲保全未嘗失禮尤不應如此
相待昨已派榮祿徐桐崇綺留京辦事然當各國氣勢方張之際恐在
京未能遽與開議該大臣公忠素著平日威望亦爲外人所信服國事
至此不知該大臣正復如何憤激着即迅籌辦法或電各國外部或商
上海各總領事從中轉圜務期竭盡心力爲國家消此大患朕不勝翹
盼之至將此由六百里加緊諭令知之

交護直督廷
雍轉遞上海

二十六日 行四十里駐蹕宣化縣之鷄鳴驛下詔罪己

綏遠城將軍永德副都統奎成奏歸綏道屬教堂人衆包藏禍心請派

軍剿辦摺

是爲奏摺連行在之始

旨寄永德等來奏悉教民聚集教堂豈能以風聞無據之詞遽指爲反形已露冒昧興戎所有山西香火地鐵疙疸溝教堂着該將軍等鎮靜保護所請派軍勦辦之處著不准行

陝甘總督魏光燾等奏購買米石請旨運解何處摺

旨寄永德奎成魏光燾端方李廷簫據永德等奏商定糧石運京一摺現在暫幸太原隨扈衆多恐妨民食寧夏購買之糧着徑運山西

上諭我朝以忠厚開基二百數十年厚澤深仁淪浹宇內薄海臣民各有尊君親上効死勿貳之義是以盪平逆亂海宇乂安皆賴我列祖列

宗文謨武烈超越前古然亦以累朝親賢夾輔用能宏濟艱難迨道光咸豐以後漸滋外患胥賴廟謨默運卒能轉危爲安朕以冲齡入承大統仰稟聖母皇太后懿訓於祖宗家法恭儉仁恤諸大端未敢稍有隕越亦薄海臣民所共見共聞不謂近日釁起團教不和變生倉猝竟致震驚九廟慈輿播遷自顧藐躬負罪實甚然禍亂之萌匪伊朝夕果使大小臣工有公忠體國之忱無泄沓偷安之習何至一旦敗壞若此爾中外交武大小臣工天良具在試念平日之受恩遇者何若其自許忠義者安在今見國家阽危若此其將何以爲情乎知人不明皆朕一人之罪小民何辜遭此塗炭朕尙何所施其責備耶朕爲天下之主不能爲民捍患即身殉社稷亦復何所顧惜敬念聖母春秋已高豈敢有虧

孝養是以恭奉變輿暫行巡幸太原所幸就道以來慈躬安健無恙尙可爲天下臣民告慰自今以往幹旋危局我君臣責無旁貸其部院堂司各官着分班速赴行在以資整理庶務各直省督撫更宜整頓邊防力顧疆圉前據劉坤一張之洞等奏沿海沿江各口商務照常如約保護今仍應照議施行以昭大信其各省教民良莠不齊苟無聚衆作亂情形即屬朝廷赤子地方官仍宜一體撫綏毋得歧視要之國家設官各有職守不論京外大小文武咸宜上念祖宗養士之恩深維主辱臣死之義臥薪嘗膽勿託空言於一切用人行政籌餉練兵在在出以精心視國事如家事毋怙非而貽誤公家毋專已而輕排羣議滌慮洗心匡予不逮朕雖不德庶幾不遠而復天心之悔禍可期矣將此通諭知

之

二十七日 行六十里駐蹕宣化府城

旨寄口北道鍾培朕奉慈輿西幸沿途需餉甚急所有口北道庫存銀兩及宣化縣經徵未解各項錢糧並張家口殺虎口歸化城未經起解稅銀均着設法解交行在前路糧臺接收毋延

旨寄各直省將軍督撫監督所有部撥凡關京餉及內務府經費等款着迅卽全數解交行在以應急需

旨寄馬玉崑等畿甸軍情着該提督派弁連環偵探按日具報近日關內外官弁兵勇沿途絡繹輒以隨扈爲名幾至無從稽考尙復成何事體並着馬玉崑嚴飭守關將士自奉旨之日起苟非有旨徵調之兵一

概截留不准擅放出關

交片何乘鰲軍機大臣面奉諭旨近聞逃兵潰勇託名扈從肆行搶掠尙復成何事體着何乘鰲將原帶之正定四營即由保定調回帶同馳往宣化至大同一帶查明散勇嚴行截止

交片甘肅布政使岑春煊軍機大臣面奉諭旨昨派岑春煊督辦前路糧臺原爲接濟兵食起見如有兵勇不聽號令沿途強取糧米無論何營兵勇准該藩司即照軍法從事

諭前路糧臺甘肅布政使岑春煊着設法採買米石以供軍糧無任缺乏如有兵勇強取卽按軍法從事

諭莊親王載勛輔國公定昌蘇魯岱着充行在查營大臣並稽查買賣

街事務

諭溥興着照料行在宮門並照管傳諭各事宜

旨寄榮祿等所有在京王公大臣除榮祿徐桐崇綺留京辦事外其餘

各員速赴行在

寄保定府交署直督廷雍迅寄京城
凡途中恭奉明諭旨發均照此辦理

上諭在京各部院堂官除崑岡崇禮裕德敬信阿克丹溥善那桐陳夔龍派令留京辦事外其餘各官着卽率同得力司員速來行在辦事

上諭直隸懷來縣知縣吳永着開缺以知府留於本省補用

旨寄馬玉崑所有孫萬林萬本華奇克伸布三軍均着歸該提督節制調赴後路分段扼要駐紮分日拔隊啟行無庸隨扈西上

旨寄察哈爾都統芬車着即挑選壯馬一千匹迅解山西以供御用

諭何乘鰲著截留散勇擇其精壯者編營成軍後由口北道籌給餉需
軍機處遵旨傳諭口北道鍾培宣化府知府李肇南宣化縣知縣陳本
等現在天氣炎熱隨扈人衆步行勞苦殊甚著該道等多備車馬供給
二十八日 駐蹕宣化府城詔求直言

上諭奉懿旨頃倉卒西巡所有與各國應議事件已派王大臣在京安
爲商辦各直省將軍督撫均著照常辦事鎮靜民心於交涉事宜仍照
條約辦理倘有匪徒滋事立即嚴拿勦辦著即諭知該府廳州縣徧貼
告示俾衆咸知

上諭加恩免直隸宛平等州縣蹕路所經錢糧一年

上諭著李廷簫傳諭署大同鎮總兵楊鴻禮速即帶兵到大同府界上

迎駕與宣化府知府接替交換

二十九日 駐蹕宣化府城

旨寄護理陝西巡撫布政使端方秦中自古爲帝王州山河四塞着端方審度形勢於西安府城預備駐蹕之所蹕路所經飭地方官預備坐落一切概從節省勿令承辦各員浮冒開銷

上諭寄山西巡撫毓賢傳諭李廷簫現在南北文報梗阻晉省電線半遭拳匪毀壞着趕緊派員修理以通消息

上諭寄護理直隸總督廷雍山西巡撫毓賢現在蘆溝保定獲鹿沿途一帶是否安靜文報能否暢行着即派撥兵丁探報在京部院堂官有由南路趕赴行在者着即妥備車輛資送

旨寄廷雍袁世凱裕長所有湖南布政使錫良統帶兩湖入衛之軍現抵何處迅卽探明飭令該藩司向山西陝西一路進發山西布政使升允所帶陝西馬步隊是否已抵正定着廷雍一并傳知帶赴行在

旨寄馬玉崑着速卽查明大學士榮祿現在何處迅卽奏聞

三十日 駐蹕宣化府城

旨寄李廷簫朕奉慈輿巡幸太原八月初五六日可到大同拳民習氣太重晉省尤多慈駕經行未便聽其擾攘着該護撫迅卽設法解散毋令羣聚爲患

旨寄李廷簫朕巡幸太原需用浩繁行抵大同卽處不給着該護撫無論何款先行提銀數萬迅解行在

上諭寄李鴻章全權大臣李鴻章著准其便宜行事將應辦事宜迅速辦理朝廷不爲遙制接奉此旨後先行覆奏以慰廑系將此由六百里加緊諭令知之交何乘鰲差遞保定交廷雍轉寄上海探投

上諭宣化縣知縣陳本着以知府用並交軍機處記名

八月初一日 行六十里駐蹕宣化府之左衛城

李廷簫奏遵旨迎駕起程日期摺

旨寄李廷簫聞太原一帶團民紛聚着李廷簫會同大同鎮總兵楊鴻禮在大同府截留潰勇不准前進糾合生事如敢闖越即按軍法懲辦初二日 行六十里駐蹕懷安縣城

交片何乘鰲楊鴻禮軍機大臣面奉諭旨傳知何乘鰲楊鴻禮現在游

崑岡等奏
時局危迫
請飭慶親
王回京與
各使速定
大計摺

兵潰勇紛紛滋事殊屬不成事體所有枳兒嶺以東着何乘鰲收撫遣散枳兒嶺以西着楊鴻禮嚴行堵截

旨寄馬玉崑前令孫萬林萬本華奇克伸布三軍均歸該提督節制調赴後路駐紮乃各該軍仍復紛紛西上殊堪駭異着即迅速調回嚴防要隘如有不遵着該提督指名嚴叅

大學士臣宗室崑岡尙書臣崇禮尙書臣裕德侍郎臣溥善侍郎臣阿克丹侍郎臣那桐等奏爲時局危迫合詞籲懇恭摺瀝陳仰祈聖鑒事
七月二十日洋兵進城街市人心擾亂所幸尙未大肆殺燒次日傳聞皇太后皇上鑾輿西狩未能深悉隨扈王大臣究係何人西南各城道路梗阻惟臣等均住東四牌樓迤北當即會面商議並聞總理衙門章

京舒文等已函詢總稅司赫德探各國意見所在經赫德覆稱於二十七日申刻請在京各大臣到稅務司公所接晤屆期經臣崑岡等前往該公所晤談據赫德云現在中國時事艱危已至於此總稅司素受朝廷厚恩斷不忍袖手膜視但各國素與慶親王奕劻辦事多年最爲信服現在北洋大臣李鴻章到京尙需時日恐緩不濟急必須三日內請慶親王迅速會晤以安宗社而救萬民若稍遲緩則大局不堪設想雖總稅司亦無能爲力等語臣等當因限期促迫告以慶親王業已出京即使請旨飭回總須數日之期該稅司仍復再三敦促臣等伏思此次禍變起自倉猝實爲古今所未有宗廟社稷關繫重大設因遲延致各國洋兵到齊則更禍變加厲雖萬段臣等之軀不足塞責臣等公同商

議惟有籲請諭旨迅即飭下慶親王奕劻並請簡派一二親信大臣兼程回京與各駐使速定大計以便轉危爲安上保宗社下拯生靈天下臣民幸甚臣等不勝急切待命之至儻請簡派之王大臣來京稍緩則宗廟臣民斷難保全矣再赫德來函暨臣等往晤赫德問答一紙謹當錄呈聖鑒再所有未曾出京之王大臣因道路梗塞不及知會列銜奏摺亦因倉猝未能如式合併聲明伏乞皇太后皇上聖鑒訓示謹奏光緒二十六年七月二十九日發八月初二日奉旨寄慶親王奕劻現據崑岡等奏接晤赫德請速派親信王大臣回京議款可以轉圜一摺著該親王即日馳回京城便宜行事會商各國使臣妥籌停戰議和之策全權大臣大學士李鴻章前已降旨准其便宜行事著卽迅速北來會

同奕劻妥慎辦理並派載瀾齋諭馳赴宣化府面交奕劻催令北上

初三

夜四鼓繕旨遞上發下
派載瀾馳抵宣化面交

謹將總稅務司赫德覆函繕呈御覽二件

敬覆者本月二十三日始奉到二十二日鈞函聆悉一切函內所謂各國主見若何和局應如何酌議均望維持賜覆等因竊以爲此事不如請列位總辦於二十五日下午四點鐘時到崇文門內高井廟面商一切總稅務司在彼拱候否則應請貴署當軸大憲自請面會各國駐京大臣晤商一切或備文照知均無不可各國並無害國傷民之主見如有大臣出頭商辦定可轉危爲安惟應愈速愈妙遲則不堪設想矣至彈壓土匪一層各國大臣已經商辦並備有告示因

無刻版礙難徧處張貼合將所交底稿送呈請爲刊刻刷印千張送
至總稅務司處以便轉請各國大臣蓋印遣人張貼其示內要義莫
非令華民各安生業照常安居其餘威嚇各語亦不過保護善良之
意除華文告示外各國商同出一洋文禁令不准洋兵亂行騷擾如
尊意果有使宗社轉危爲安之情自當速照以上各節立即施行又
數日內各國使臣及使館婦孺均未受傷合并附聞請爲放懷

敬啟者造冊處戴樂爾與江海關稅務司商同辦理總稅務司事務
一事曾於六月二十六日函覆在案現在京滬通信所有總稅務司
事務應由總稅務司暫在崇文門內高井廟自行照常辦理無庸該
二稅司代爲商辦除電知遵照外合行函達並希電知南洋大臣一

體查照可也再現在大局岌岌若能於稅務一事內稍有轉機或能與國政不無裨益此卽總稅務司之深願想貴署亦必同以爲然也

謹將與總稅務司赫德問答節略錄呈御覽

總稅務司赫德定於二十七日四點鐘到彼會晤各堂均在章京舒文家內會齊同往詎料所派護衛洋兵逾時未來天色已晚溥大人善那大人桐已散去洋兵始到崑中堂岡裕大人德阿大人克丹暨繙譯官張德彝隨同前往崇文門內高井廟總稅務公所會晤寒暄畢告以我們實覺對不住各國大臣暨赫大人現在中國時事敝壞至極萬分危急我等孤臣與閣下共事多年素所欽佩向蒙皇太后皇上倚重相待最優現值國事如此之糟諒閣下亦不能辭其責是

以我等前來奉求閣下設法斡旋以救眉急赫云中堂大人有何意見尙望示下以便商酌答以重大事件我們一時亦不敢擅定惟目前最急者保護宗廟社稷東西兩陵以及禁城以裏大內各地方均爲最要其次則百萬生民性命全仗赫大人旋乾轉坤之力向各國大臣設法婉商俾得保全一切不但我等數人即天下官民亦均感激於無旣赫云外洋向以百姓爲第一宗社尙在其次所說數事尙不甚難但必須慶王爺急速回京李中堂來與不來均可緣慶王爺在總署辦事多年謹慎和平爲各國所欽佩是以各國均願與慶王爺早日商議和局大事倘若遲遲不來恐大內一切不堪設想緣兵丁把守日久總無定議難免騷害不但我無此權力阻攔即各國帶

兵之人亦難照應周到更恐德國兵來決裂堪虞必誤大事諸位中堂大人於三日期內可能請慶王爺回京答以王爺隨駕不知現在何處三日內萬不敢應赫云早來原爲於中國有益如若稍遲恐宗社陵寢難以保全奈何答以我們必趕卽具稟呈王爺作速回京然往返程途亦須數日請閣下向各國大臣婉言總望稍寬日期方妥赫云無論王爺能否卽行回京務請中堂大人於八月初一日午後四點鐘仍來高井廟一會中堂大人答云如此甚好此節要事皆蒙赫大人竭力拯救中國萬民感激現在不必說將來我們也要叩謝的言畢總稅司立起中堂大人即亦辭去

崑岡等片 再皇城以內現有洋兵護守仰賴皇太后皇上如天之福

後各處均
無恙片

榮祿等奏
率各軍退
駐保定摺

所有各處宮殿及衙署均各無恙二十一日以後洋兵陸續進城人心驚駭紛紛逃竄近日焚掠漸止民情稍定堪以仰慰慈廑臣等目擊情形各國意在修好似乎可信謹附片具陳伏乞聖鑒謹奏

初三日 行八十里駐蹕天鎮縣城

奴才榮祿奴才崇綺奴才董福祥奏爲合詞馳陳恭摺仰祈聖鑒事竊本月二十一日奴才榮祿聞我皇上恭奉皇太后聖駕西巡後與奴才崇綺在禁城內相見大哭共以爲外洋欺我至於此極眞所謂翻天覆地變出非常凡屬臣子報讐雪恥固屬刻不能忘而豺狼之心恐猶未饜最須加意昨已有旨令馬玉崑帶兵扈從奴才榮祿本擬收合殘卒竭力巷戰誓掃賊氛惟時見城中四處火起喊殺之聲大振居民擁擠

奔逃知事不可爲然聞變輿在外未敢輕守小節當與奴才崇綺馳出西直門適各官民眷屬紛紛避難城門擁塞極其擾亂經奴才等帶兵出城各眷屬始得先後走出奴才等取徑盧溝橋長辛店各市鎮盡爲教匪游勇等蹂躪不堪人皆逃避行者無從覓食慘目傷心莫可言狀奴才榮祿僅隨帶武衛軍數營擬收集各軍力圖恢復適張春發陳澤霖余虎恩等皆先後來見軍威稍壯聞道塗傳言洋人教匪之心頗疑變輿係由盧溝橋一帶西幸者奴才榮祿當飭陳澤霖於盧溝橋上安設巨礮數尊以作疑兵使敵深信駐蹕於此以免追騎繞道驚犯而奴才崇綺以爲僅有馬玉崑一軍扈蹕終虞單薄旗兵又不足恃必得董福祥帶兵馳往方可放心與奴才榮祿意見相同即派妥弁探訪奴才

董福祥蹤跡果於良鄉行次相遇隨即會同熟商奴才董福祥亦正有此意現擬收齊所部馬隊儘數帶往尅期二十三日由良鄉開拔趨程並進其步隊即點交奴才榮祿暫行接統奴才等統籌全局自以收復京城爲第一要義惟各軍皆屢敗之餘憊乏異常軍心不固沿途查看情形竟有紛紛思亂之意奴才榮祿忝領師干痛憤填膺亟思一戰迅圖恢復無如士氣屢挫率此憊困殘卒與敵輕於一試奴才一死不足惜特恐貽誤大局不可收拾刻下惟有馳抵保定整頓隊伍養復銳氣恭候諭旨再相機進取以期穩慎其南來援軍多係新集之師以之攻敵則不足以之擾民則有餘奴才擬分飭各軍暫駐保定府以南一帶聽候調遣以銷亂萌而靖民心是否有當謹合詞馳陳伏乞皇太后皇

上聖鑒訓示再提督孫萬林當二十日敵攻朝陽門甚亟奴才榮祿飛飭該提督出安定門抄敵後路並飭提督李成金助勦力戰數時之久始行退敗傷亡頗衆奴才即飭孫萬林整率所部迅即帶往恭衛行在現時已否馳抵尙未據稟報合併陳明謹奏光緒二十六年七月二十三日發八月初三日奉旨寄榮祿前派該大學士與徐桐崇綺留京辦事茲據奏稱崇綺已率各軍退駐保定徐桐是否已赴行在尙未據報現在已派奕劻李鴻章與各使議款並授李鴻章爲全權大臣該大學士俟李鴻章到後迅即與之會商一切事宜

旨寄李鴻章全權大臣李鴻章著即借乘俄輪來京會同慶親王奕劻商辦一切事宜得旨後即迅速啟行毋延

寄廷雍轉交赫德遞至上海

旨寄總稅務司赫德據大學士崑岡奏與該總稅務司會晤情形數十年借材異地至此彌見惻忱朕心欣慰之至現已派慶親王奕劻會同該總稅務司與各國妥商一切又寄全權大臣李鴻章諭旨一道著該總稅務司與各國使臣商借兵輪將朕寄諭送至上海俾該大學士迅速來京辦事並將一切情形告知該大學士得以通曉封交慶王轉遞

旨寄馬玉崑現派慶親王奕劻大學士李鴻章回京辦事文報緊要著責成該提督自京師抵行在一帶安設馬撥接遞文報毋令遲誤

旨寄榮祿保定爲省城重地關繫緊要現在張春發陳澤霖余虎恩三軍稍稍收集該大臣務當重加整頓鈴束撫綏以期振作士氣力固省防獲鹿固爲直晉衝衢必應用重兵鎮守此外沿邊入晉之路尙多並

應一體嚴防不可稍有疏漏鹿傳霖陳鳳樓兩軍計程早當行抵直境並着統歸榮祿節制以一事權昨據崑岡等奏現與赫德會商收束情形已命慶親王奕劻迅回京師並飭赫德商借海輪令李鴻章乘坐來京會同商辦一切惟敵勢方張夷情叵測在我仍應格外加嚴力籌戰守不可因有議和之舉稍存觀望致誤戎機是爲至要

六百里交董軍原摺差齊交

初四日 行五十里駐蹕陽高縣城

李廷簫奏解散教民籌辦情形摺奉硃批知道了仍着趕緊設法解散陝甘總督魏光燾奏遵旨飭管帶甘軍總兵馬安良招募四營入衛摺奉硃批知道了仍着飭催馬安良趕緊成軍開赴行在

又奏遵旨籌撥寧夏倉穀接濟京軍片奉硃批着改運山西減價平糶

初五日 行七十里駐蹕聚樂鎮

上諭據岑春煊面奏太監張天順冒充前站騷擾驛傳張天順着即行正法

上諭據岑春煊面奏神機營兵丁強劫驢騾拒傷人命着即行正法幫帶官恒喜彈壓不服着革職發往新疆充當苦差

上諭所有神機營虎神營十處練軍各營着王大臣及董福祥馬玉崑各統領即日將各營嚴行挑選分別隨扈及分防後路兩項開具名單由軍機處派員點驗至榮祿所統之陳澤霖張春發余虎恩三軍或甫經到防旋即潰散或尙未成列相率奔亡張春發尙能一戰陳澤霖全不知兵李秉衡前奏言之猶有餘恨現該軍隨榮祿退至保定着該大

臣即與廷雍認真淘汰餉項總須截清起支支界限勿令糜費是爲至要又夏辛酉一軍是否已回山東即着袁世凱一體查明辦理旨寄董福祥所有該軍收集馬隊現尙整齊每日啟鑾着派一半在前行走一半在後行走以肅輿衛

初六日 行七十里駐蹕大同府城

陝西巡撫魏光燾奏董軍現復添募六營甘省力難供支摺奉硃批榮祿所統武衛中軍大半潰散着卽以該軍截留之餉供支董軍

兼護山西巡撫布政使臣李廷簫奏爲晉省去敵甚近亟宜嚴密設防以資保衛恭摺仰祈聖鑒事竊晉爲表裏山河之地近來民氣馴弱餉項艱難以致兵備空虛竟爲各省所僅見現在翠華西幸駐蹕太原省

李廷簫奏
晉省去敵
甚近亟宜
嚴密設防
摺

東省北兩路均與敵鄰防守最關緊要且聞洋兵有分枝繞赴京西之說晉省東去京師千有餘里保定爲第一重門戶正定滹沱河爲第二重門戶獲鹿入山以後四大天門節節險要爲第三重門戶現各省入衛之兵雲集畿疆究竟每路各有若干臣固無從深悉而就所知者如山西按察使臣升允所帶陝軍駐紮保定現前敵各軍均駐保定一帶似可抽出升允一軍移駐正定滹沱河以固井陘來路較爲周密又湖南布政使臣錫良從前宦晉多年地利民情均極熟悉士民至今感之現聞督兵入衛未知行抵何所可否調令來晉以厚兵力而繫人心至其餘入衛各軍似可挑選一二軍赴正定獲鹿一帶與撫臣毓賢駐防固關之兵聯爲一氣聲威較壯東路方可無慮省北大青山以後接近

俄疆而口外七廳教民醫集誠恐勾結爲患防不勝防綏遠城將軍大同鎮總兵兵力甚單不敷分布擬請飭下實任大同鎮總兵劉光才迅帶所部數千人星夜來晉現太原爲乘輿所在較江防尤爲緊要兩江督臣劉坤一顧全大局當此時事孔亟定當飭令前來又蒙古草地寬平無際最難守衛固原提督臣鄧增久歷戎行前在左宗棠軍營打仗最爲得力可否飭令迅帶所部就近擇要屯駐北路有此兩軍應可稍資防守至晉省西南毗連陝豫陝省近極安堵豫省清化鎮等處聞有土匪聚衆搶掠沿及晉邊亦宜趕緊殲除湖南布政使臣錫良此時當已抵豫可否飭令就近勦辦順道入晉最爲便捷臣管測所及無當萬一係爲慎重晉防起見未敢緘默不言是否可行惟祈聖明採擇所有

軍機處咨
晉撫本諭
命赫德借
船接李鴻
章來京文

晉省去敵甚近亟宜嚴密設防以資保衛各緣由理合恭摺具陳伏乞
皇太后皇上聖鑒訓示謹奏光緒二十六年八月初四日發初六日奉
旨寄升允着將所帶現紮保定陸軍移紮紫荆關靈邱縣一帶該縣係
直晉交界升允務當嚴密設防並遣散潰勇以防滋事

軍機處咨晉撫文 爲咨行事前奉諭旨命赫德向各國商借輪船赴
滬接李鴻章迅速來京會同慶親王商辦事宜並有寄李鴻章諭旨一
道著該稅司派員齎送業已分別字寄在案惟事經展轉猶恐或有錯
誤謹恭錄前次諭旨列後即希貴撫迅速轉電李大臣可也
諭旨已見初三日不贅

初七日 雨駐蹕大同府城

上諭端郡王載漪着派充軍機大臣從剛毅之請也

上諭載瀾著派充御前大臣

李鴻章奏
陳時局變
遷急籌補
救摺

商務大臣大學士調任直隸總督臣李鴻章奏爲時局變遷急籌補救恭摺馳陳仰祈聖鑒事竊臣於七月十六日接濟南遞來電報七月十三日欽奉恩旨授爲全權大臣當即欽遵電商各國駐使轉致外部商議一切即經據實電奏當羣雄紛擾之會作孤注一擲之謀今欲排難解紛挽茲危局送使剿匪兩層均未實力辦到雖百喙難以自明斷非棉力所能勝任容俟各國派有全權開議時再籲請欽派親信曉事之王大臣會同籌議並將接到俄英美日各駐使覆電馳陳在案乃於七月二十七等日先後接袁世凱廷雍來電驚悉各國聯軍已於二十一日攻進京城乘輿即於是日倉猝西幸聞信之下神魂飛越主憂臣辱

罪該萬死臣即於二十五日馳電各國詰以各外部前俱有言派兵係爲援使今聯軍到京各使無恙自可即行停戰止兵速派全權會議善後是否即在北京商議一俟確信即便北上等語連日接羅豐祿覆稱沙侯云兩電已轉寶使令將所見電陳英廷方能決定辦法又接楊儒覆電俄戶部外部云俄始終願保和局若東三省鐵路無警本允不派兵嗣因該將軍自認不能彈壓俄始派兵曾經聲明專爲保路助剿不與兵民相難孰意東省不自剿匪反與我尋釁首先越界轟我邊城至有今日誰執其咎貴政府於剿匪弭釁保路保使各節至今無一施行刻須略審事情再定辦法又接呂海寰覆稱德外部面告京內情形尙未查明中國前派全權各國均難遽認復將去電譯交但云存案不置

准駁恐非兵到難以開議又接伍廷芳電稱切商外部覆稱中國並未協助救使致各國重費兵力但美廷仍願會商停戰惟須北京各處平靜顯明政府確有自能停戰之權美另派員與中國實在任事秉權之政府所派大員會同各國和商又接李盛鐸覆稱外部青木面談聯軍入京後日廷即商各國可否停兵除美廷答電外餘皆不答意可概見臣奉旨在前現外兵入京情形迥異必須另行請旨並多派王大臣如慶親王榮祿劉坤一張之洞皆須派人劉張兩督不必與各使面商又諭旨內須有朝廷自行引過辭意如此各國當可開議現難遽派全權各等語查向來停戰議款皆須彼此各派全權方能開議臣自奉命後迭電各國屢催罔應始終以我送使不實則臣不力爲辭今則洋報紛

言駐京各使均謂攻圍使館確係中國政府主謀各處拳匪毀教堂殺教士不知凡幾亦皆政府所縱使此各國之公憤英美既不以此時中國議和爲然至德國則已派大帥華爾德士統陸兵七萬民兵二千陸續來華尙欲用武以雪其戕使之恥俄則藉口黑龍江奉天啟釁毀路於東三省地方構兵不已迭陷要城各國正在會謀所以處中國者必逾尋常故覆電皆游移閃爍之詞或謂須在德國大帥統兵到華之後將以全力壓我以要成也夫京城已至失陷乘輿已至播遷而各國猶以爲有待蓋恃其國衆而兵強我則勢弱而辦誦更甚於四十年前之事溯查咸豐十年英法北犯之事欽派恭親王留守授爲便宜行事全權大臣督辦和局洋兵到城和約卽定此次留守王大臣未知所派何

人恐於洋務素未諳練臣衰憊庸材位望權力皆不足勝此艱鉅且奉
派在敵兵未入京城之前無怪彼以爲情形迥異臣所授全權各國均
難遽認日本青木所擬另行請旨多派王大臣如慶親王奕劻大學士
榮祿及兩江總督劉坤一湖廣總督張之洞皆須派入並請旨內有引
過辭意如此各國當可開議等因臣統觀各國覆電惟日本較爲切實
其唇齒相依願早議結意可想見此誠國家存亡危急之秋臣旣不敢
諉卸亦斷不敢拘泥可否仰懇聖明以社稷蒼生爲重俯察青木所言
迅賜添派慶親王榮祿劉坤一張之洞爲全權大臣便宜行事以期尅
日開議早底於成否則彼旣不認臣爲全權頓兵不議或至進兵深入
擾亂各省臣一身不足惜其如大局何再慶親王榮祿尤爲各國所注

李鴻章奏
請旨聲明

重如已隨扈西巡應請飭令星夜回京命下之日臣即當轉電各國派
定議事之使臣以便慶親王榮祿同臣約期到京會集開議免致延誤
劉坤一張之洞各有疆守如蒙派入儘可電商值茲至大至艱之事宜
收羣策羣力之功痛哭瀝陳罔知忌諱謹由上海電遞西安護理陝西
巡撫臣端方代繕由驛六百里加緊具摺馳陳伏乞皇太后皇上聖鑒
訓示遵行謹奏光緒二十六年八月初三日發初七日奉旨電李鴻章
來奏閱悉初三日因崑岡等奏報與赫德會晤情形已命慶親王奕劻
回京該大學士著仍遵前旨乘輪來京會同慶親王力挽危局卽派劉
坤一張之洞彼此函電會商六百里知會端方轉電

李鴻章片 再此次中外啟釁不及三月至於兩宮蒙塵京師失陷內

拳匪罪惡
飭各路援
兵認真勦
辦片

藏悉被焚掠生靈盡遭塗炭實爲本朝二百四十年未有之奇禍亦爲
歷代史乘所罕見天下臣民莫不謂拳匪所誤各國進兵亦皆以勦拳
匪爲詞今洋兵已入京城非特不退抑且添兵聞其意在藉勦拳匪深
入內地故弁兵皆備寒衣恐非旦夕所能了結又聞畿疆拳匪潰兵充
斥沿途搶掠民不聊生官不勦固不能保民官不勦而留爲外人代勦
更不能爲國至於外人代勦則必數十萬生命數十郡縣財產盡沒矣
可否即請明降諭旨聲明拳匪罪惡飭令直隸總督督飭文武及各路
援兵認真勦辦並令各直省將軍督撫遇有會匪滋生事端盡力痛懲
以靖地方而快人心於議和之局尤有關繫伏乞宸斷施行謹附片具
奏請旨

榮祿崇綺
奏擬嚴密
防堵獲鹿
並派軍解
餉赴行在
摺

奴才榮祿奴才崇綺奏爲合詞馳陳恭摺仰祈聖鑒事竊本月二十三
日奴才等由良鄉途次會摺恭請皇太后皇上聖安並商令董福祥即
日率領馬隊馳赴宣大一帶扈從鑾輿奴才等擬馳至保定簡練隊伍
以圖恢復各情諒邀睿鑑奴才等拜摺後即取道涿州定興安肅各州
縣於二十六日行抵保定省城查看沿途被兵情形居民逃避無蹤財
物搶掠罄盡滿目荒涼不能殫述奴才等途中無從覓食忍饑耐餓間
得薄粥一盂聊以度日伏思我皇太后皇上巡幸畿右道路崎嶇食物
缺少每念及此五中如焚此奴才等延頸西望所爲刻不能忘者也昨
由六百里飛咨署山西巡撫李廷簫署陝西巡撫端方迅速出省恭迎
皇太后皇上聖駕並令多帶米麵暨各種食物敬供御用其山路險巇

之處車馬難行卽由各該撫預備肩輿駝轎多乘遠出迎候勿誤要需並劄知升授山西臬司升允酌帶馬隊兩旗步隊一營迅由涿州涑水一帶翻山取道將應解戶部之二批京餉銀六萬兩鐵路經費銀五萬兩一併解呈行在此項銀兩到時謹請旨飭下軍機大臣先提銀若干萬兩敬備內廷需用其餘銀若干萬兩應如何分給隨扈之王貝勒以下文武大小官員及無從支餉之旗營兵丁以資津貼之處酌定章程奏明辦理奴才等仍飛咨各直省督撫將應解餉項源源接濟免致資用匱乏近日風聞洋兵有佔據獲鹿縣以圖入晉之意固係教匪散布謠言聳動人心然如安肅之安家莊清苑之東閭村河間之黑風口及正定府左近等處教民現因洋人得勢頗形蠢動時出擾害深恐蔓延

奴才等擬撥所帶隊伍揀派得力將領前往獲鹿地方嚴密防堵以期有備無患奴才等自抵保定後妥爲籌商目前報讐雪恥自以收復京城爲亟務然非得大枝生力軍以振其氣徒以屢敗疲卒見敵退蕙欲恃以圖功其成敗不待智者而知况蹂躪民間皆散勇敢匪之所爲經奴才等嚴行懲辦始稍知斂戢即令收集成軍亦徒糜餉項奴才等擬淘汰潰勇令繳軍械一面趕速添練新軍以圖進取使人皆有發奮自雄之心然後可收戰勝攻取之效其張春發陳澤霖兩軍仍令回駐江南淮徐一帶認真訓練所有南來各軍查其難期得力者應一併飭歸庶可以紓餉力而衛民生奴才等反覆思維固不敢偷安苟且視進取爲緩圖亦不敢孟浪從事以全局爲孤注區區愚誠想蒙垂察所有合

詞馳陳緣由謹恭摺具陳伏乞皇太后皇上聖鑒訓示謹奏光緒二十六年七月二十八日發八月初七日奉上諭榮祿現駐保定前已有旨令收集各軍力固省防惟由直入晉邊隘甚多紫荆關尤爲要口該大學士務當統籌兼顧或分兵駐守或扼要嚴防並多設偵探以期消息靈通隨機策應現在和戰尙無定局亟宜乘此時力修戰守之備該大學士手握兵符尤當鼓勵各軍聯爲一氣俾有事互相援應庶幾於大局有濟將此由六百里諭令之

榮祿崇綺
奏擬親往
獲鹿佈置
片

榮祿等片 再正緒摺間適護理直隸總督廷雍交閱盛宣懷自上海來電稱探聞洋兵有另由河西務赴駐京西南之語是奴才等所聞洋兵欲佔據獲鹿之說雖屬謠傳未始無因除飛飭總兵張行志率領所

榮祿崇綺
奏收集隊
伍以圖規
復片

部甘軍十營迅即開往獲鹿扼要駐紮並飭總兵姚旺何得彪各率所
部分駐定州正定以資防堵外奴才等現將隊伍整理仍擬趕速馳赴
獲鹿相機佈置以遏洋兵入晉西竄之路庶幾有備無患理合附片陳
明伏乞聖鑒謹奏

榮祿等片 再正封摺間適准輔國公載瀾來函並鈔寄英年口傳七
月二十二日諭旨著派董福祥速帶馬步十數營星夜前赴行營隨扈
欽此又奉諭旨著榮祿徐桐崇綺留京辦事欽此伏查七月二十一日
洋兵攔入都城巷戰未能得手奴才等始出西直門收集隊伍以圖規
復適於良鄉地方與董福祥相遇商令率帶馬隊迅速馳往隨扈變輿
業於本月二十三日會摺奏明在案奴才等連日途次熟商如飛咨山

陝巡撫備辦肩輿駝轎多帶米麵食物飭令臬司升允解呈餉銀敬供御用並飭總兵張行志等扼紮獲鹿各要隘皆思所以拱衛行在不敢稍涉疎忽奴才等仍惟有殫竭血忱儘力籌辦以期仰慰宸廑謹附片具陳伏乞聖鑒謹奏

初八日 駐蹕大同府城

上諭榮祿等奏退駐保定及派兵解餉拱衛行在各摺片獲鹿爲入晉衝途自應派撥重兵前往扼紮惟保定爲省城重地距京較近且係獲鹿後路該大學士仍當駐此調度毋庸前往獲鹿各軍新敗之後不免挫喪銳氣安所得大枝生力軍以振其氣至張春發陳澤霖兩軍誠不得力然與其回駐淮徐虛糜餉項不如就現存人數嚴加淘汰重整營

馮子材致
樞垣遵旨
由滇帶兵
北上電

規俾壁壘一新足資調度若另募新軍無非各處潰兵散勇濫竽充數
又安見其必能得力耶以上各節該大學士務當殫精竭慮以求至當
仍安心坐鎮勿稍紛營是爲至要將此由六百里加緊諭令知之

旨寄兩江總督劉坤一前據毓賢奏請飭大同鎮總兵劉光才統帶所
部迅赴本任當以江防緊要未卽允行現在晉邊一帶守備空虛着劉
坤一飛飭該總兵迅即帶隊前來藉資扞衛

旨寄魏光燾着陝西固原提督鄧增迅帶所部趨赴行在
旨寄魏光燾着總兵馬安良迅即成軍帶赴行在

雲南提督馮子材電信 奉上諭現在中外開釁畿疆待援孔亟雲南
提督馮子材着卽統帶數營迅速來京以備調遣將此由六百里諭令

知之欽此遵旨寄信前來聞命之下急如星火現已飛調舊部各營擇其見慣洋務者尅日至滇會商署督臣丁振鐸迅備餉糈軍械即日北上不悞事機用紓宸廑謹先電請代奏

初九日 駐蹕大同府城

湖南巡撫俞廉三奏聞聖駕西巡現籌京餉三十二萬兩解赴行在以供度支摺

上諭端郡王載漪已補授軍機大臣着開去御前差使

軍機大臣奏隨扈大小官員請酌給津貼自王公以下開單請旨片奉旨隨扈官員及由京馳赴行在大小各員着前路糧臺議給津貼

初十日 行八十里駐蹕懷仁縣城

崑岡等奏
報各國使
臣等入宮
瞻觀情形

上諭行在政務殷繁需人佐理在京各衙門亦未便有虛職守除大學士榮祿徐桐崑岡尙書崇綺崇禮裕德敬信侍郎溥善阿克丹那桐府丞陳夔龍已先後派充留京辦事大臣外餘着迅來行在

十一日 行九十里駐蹕山陰縣城之新岳鎮

大學士臣宗室崑岡尙書臣宗室敬信尙書臣崇禮尙書臣裕德侍郎臣阿克丹侍郎臣那桐總管內務府大臣臣世續總管內務府大臣臣文廉署太僕寺卿臣陳夔龍等奏爲各國使臣及兵官等入宮瞻觀大概情形恭摺奏聞仰祈聖鑒事竊臣等於七月二十九日合詞奏請飭下慶親王奕劻並請簡派一二親信大臣兼程回京速定大計一摺計已仰邀聖鑒八月初二日據日國使臣葛絡幹函稱各國統兵各員及

公使人等定於初四日辰刻俱入大內瞻仰宮廷以資保護請約一二大員先行進內通知宮內人等萬勿驚惶等語臣等以地屬宮禁再三攔阻該使臣堅稱現在京城暫歸各國保護此係各國使臣及各兵官之意礙難阻止臣等係外廷人員當約總管內務府大臣世續文廉於初三日先行公同進內曉諭各處所值班人等並傳集內監告知原委俾免宮內驚惶初四日辰刻約同使臣等入大清門進內左門出神武門僅作洋樂尙無喧譁情事臣等竊思此次洋人入宮尙知先期約會未敢擅入意在顧全邦交第和局一日不定人心一日不安惟有仰懇天恩俯如前奏飭下慶親王奕劻並簡派一二親信重臣兼程來京速定大計俾宗社人民早獲安全臣等不勝迫切待命之至謹合詞具陳

劉坤一等
奏商派大
員率隊扈
蹕並節制
各援軍摺

再臣世續現在百日穿孝期內勉從吉服進內合併聲明伏乞皇太后
皇上聖鑒訓示謹奏光緒二十六年八月初八日發十一日奉上諭寄
慶親王奕劻大學士崑岡等奏洋人入宮瞻覲難保非別有意見着崑
岡會同內務府大臣世續等妥爲保守奕劻計可到京一切事宜着該
大學士等會商辦理

兩江總督臣劉坤一閩浙總督臣許應騫安徽巡撫臣王之春江西巡
撫臣松壽革職留任浙江巡撫臣劉樹堂護理江蘇巡撫布政使臣聶
緝槩奏爲商派大員率隊扈蹕並節制各援軍恭摺馳陳仰祈聖鑒事
竊臣等前因近畿一帶軍情緊急遵旨飭派勇營北上先後奏明在案
茲聞洋兵上犯都城皇太后皇上聖駕西幸自應先其所急飭令各援

軍西行迎扈勉効馳驅惟須有知兵大員統率調度事權畫一呼應方可靈通查有本任福建陸路提督程文炳前奉諭旨募勇赴北因病未克啟行現以車駕西巡忠憤勃發自請力疾就道稍伸臣子戀主之忱臣等往返電商擬即將安徽所派之記名提督吳隆海五營江西之候補副將王德懷四營福建之福寧鎮總兵曹志忠兩營浙江之定海鎮總兵余朝貴補用副將雷芸桂四營統歸程文炳節制並令另招兩營所需餉項軍械由臣坤一酌籌撥給以資應用統計五省援軍共十七營星夜兼程前進馳赴行在恭衛鑾輿該提督程文炳曉暢戎機威望素著必能殫竭心力上副恩知除臣坤一前派陳鳳樓一軍北上係歸江蘇巡撫臣鹿傳霖節制該軍應至何處由鹿傳霖酌辦外所有派員

劉坤一奏
敬陳下悃

帶隊迎扈各緣由謹合詞恭摺馳陳伏乞皇太后皇上聖鑒再吳淞口外現駐有外洋兵船三十四艘英法各調陸兵來滬保護租界人情不免驚疑所有一應戰守事宜臣等業已嚴密籌備目下地方尙稱安靖堪以上慰宸廑合併陳明謹奏光緒二十六年八月初三日發十一日奉旨

兩江總督臣劉坤一奏爲敬陳下悃恭摺馳陳仰祈聖鑒事竊臣接據探報七月二十一日各國洋兵進犯都城鑾輿西幸聞信之下五內震駭當卽飛電直隸山西陝西等省分投探信現得護理陝西撫臣端方來電恭悉皇太后皇上聖駕於七月二十七日行抵山西陽高縣城至駐蹕何處探明後再行電知等因伏念此次各國有意尋釁以細故遽

開兵端奪我沽臺陷我津郡狼奔豕突竟致上犯京師變出非常普天同憤臣待罪南服既不能親提一旅迅掃機槍復不能入衛九重恭隨車駕痛心疾首無地可以自容江南士民初聞洋兵入都莫不憂憤驚惶奔赴臣署問信現經臣將乘輿西狩行在萬安敬謹宣示人心稍定惟是宮車遠出冒暑遄行臣敬念下忱萬言難罄伏求皇太后皇上寬懷珍重稍節憂勞俾慰天下臣民之望臣不勝迫切之至除將應辦防務及地方事宜實力經理並商令提督程文炳督帶營勇西上迎扈另摺具陳外謹繕摺馳陳伏乞皇太后皇上聖鑒謹奏光緒二十六年八月初三日發十一日奉硃批覽奏具見悃忱仍著慎固疆圉整飭吏治以固民心而維大局

十二日 行八十里駐蹕代州之廣武鎮

旨寄劉坤一着傳諭程文炳統率各軍馳赴潼關關外扼要駐紮一切情形隨時報聞

岑春煊奏遵旨酌擬王公百官津貼開單呈覽恭候欽定照行摺奉硃批依議

文職二品以上每日七兩

五品以上京堂每日五兩

章京各部司員每日三兩

中書等官每日二兩

武職一二品每日七兩

實缺參佐章京每日三兩

驍騎校等減半

親王郡王每日六十兩

貝子貝勒每日三十兩

魏光燾端
方奏請乘
與移幸西
安以遠寇
氛摺

入八分公每日十五兩

不入八分公減半

署理陝甘總督陝西巡撫臣魏光燾護理陝西巡撫布政使臣端方奏
爲聖駕西巡封章莫達謹籲請乘輿節節西來以遠寇氛而定大計恭
摺仰祈聖鑒事竊光緒二十六年七月十九日大學士李鴻章具摺奏
請勿用拳民亦勿庸西幸屬卽會銜陳奏等因電致山東撫臣袁世凱
代繕馳遞臣等當以意見不合於七月二十六日恭摺奏請聖駕西巡
由驛六百里加緊馳陳在案不圖此摺遞至保定爲護督臣廷雍駁回
復准袁世凱電稱李鴻章原奏亦由驛固封發回等因自二十六日以
後屢接晉直各電皇太后皇上已於二十一日出都由宣大一帶入晉
臣等驚愕之餘雖以乘輿出險爲幸更以勤王無力爲慚君父播遷而

臣子儉安視息實屬罪無可道瞻天仰聖無地自容惟事已如斯勝著
既不可操則敗局當求收拾昨接李鴻章電寄一摺一片由臣等代繕
奏陳所述各國答覆之詞尙無不肯言和之意而日本同洲誼切青木
所說似屬切於事情伏望聖慈獨斷早定大局如決裂不至太甚款議
可以速成則此時駐蹕太原將來回鑾較近萬一彼族要挾過甚不免
曠日相持則燕晉毗連猶恐震驚法駕擬即籲請乘輿漸行漸遠移幸
西安雖行宮工大難成而聖明慈儉爲懷關內臣民莫不延頸企踵日
望六飛之至總之和局定則以還京爲上策可以安宗社之靈和議緩
則以關中爲退步亦不受彼族之制惟臣端方因急痛憂勞觸發痰厥
舊疾近已調治較愈俟能力疾就道即行奔赴行在恭聆聖訓所有痛

迫下忱謹先具摺由驛六百里加緊馳陳並有李鴻章七月十九日奏稿一併繕具清摺附呈伏乞皇太后皇上聖鑒訓示謹奏光緒二十六年八月初六日發十二日奉旨覽

謹將大學士李鴻章等七月十九日奏稿繕具清摺恭呈御覽
大學士李鴻章等奏爲事機日迫關繫安危恭摺密陳仰祈聖鑒事
竊據山東探報七月初十日北倉被陷十二日楊村失守兵退蔡村
臣鴻章於十五日遵旨電致各國駐使與外部商議停戰已將先後
接到日本美德覆電轉軍機處總理衙門代譯頃接李盛鐸篠電陸
軍參謀次長守內正敦自津歸告知府錢恂云中國須從速特派有
威望重臣曾辦交涉素爲外人推服者面承諭旨隨帶員弁親赴前

敵與聯合軍總統早商宣布期廣議和之意並商辦送使事件據伊
看來各國當可允停戰然後各派全權議款非此辦法停戰恐難從
前德法之戰亦是京派大員止戰另派全權議款等語並囑電陳聞
戰事歸外部主持故外部不便明說此云與美國所言軍已赴前敵
未便遙制請由京派員就近與攜帳籌商按照第三條辦法語意相
同如果兵至城下必須就近派員商辦送使停戰各事能早一步好
一步可否請照美日所擬即飭總理衙門王大臣速與駐京各使臣
妥商先派明幹委員帶同繙譯赴前敵尋由所派重臣續行前進倘
能特派赫德同行似更得力但恐此次攻毀交民巷赫德亦在其內
非優加恩詔褒勉難以勸行揣度各電意總以援使勦匪爲詞始終

未易德有戕使之隙覆電亦稱知兩宮十分爲難並無仇視意請勿多慮等語此次兵起八國論戰則寡不敵衆論和則互有牽制我已竭力保全各使即德使被害亦出無心彼以公法自守有國家者非同草寇決無干犯至尊之理近有自京來者傳聞在京臣工日謀乘輿西幸者皇太后皇上以宗廟社稷爲重諒不出此但難保獻臆說者不作危詞聳聽設有播遷則瓜分之局自我迫之使成兵馬錢糧或致歸彼掌握彼乃振振有詞以後偏安之局斷難復支秦晉貧窮何能自持中國地大物博保守大一統自主之權雖迫於事機不得不彌縫遷就苟能仗祖宗之靈得人則理猶可以爲善國乘輿之遷否大清之存亡繫之即兩宮之安危亦繫之如其不遷各國有言在

先尙有可議之約可轉之機國不亡也兩宮不危也如其遷矣朝廷不自勦匪而團衆必擁衛而行聞各國已預備陸軍向西截擊千里蒙塵中途波折自蹈危機何堪設想卽幸而輦轂蒞止局促偏隅強鄰外攻草莽內伏從此無復昇平景象矣國家旣危在日夕兩宮亦何以自存此誠存亡危急之秋臣等相距較遠不能親提一旅星馳奔赴罪該萬死北望宮闕深思君父宜處萬全之地靜則安動則危千百年不拔之基卽在此幾微之念臣等見聞所及冒死瀝陳如蒙聖明俯納芻言卽日派令重臣就近與前敵各軍商辦停戰臣鴻章與各國外部相機商辦以期補救於萬一臣等謹合詞急切具陳伏乞皇太后皇上聖鑒謹奏光緒二十六年七月十九日發

廷雍奏聞
鑾輿西巡
摺專摺敬慰

暫護直隸總督布政使奴才覺羅廷雍奏爲恭聞鑾輿西巡專摺敬慰
仰祈聖鑒事竊自天津不守敵氛逼近京畿於七月十五日後自京至
保定一路文報不通偵探員弁音信隔絕至二十三日以來各營潰勇
成千累萬紛紛而下到處搶奪民不堪命遠近喧傳有洋兵已攔入京
城皇上奉皇太后西巡之說奴才聞之心身若失手足無措北望京師
神馳不已立即密派員弁分路偵探正深焦灼間適二十六日大學士
榮祿戶部尙書崇綺西來經此備述情形惟云我皇上恭奉皇太后慈
輿出居庸關西行至駐蹕何處伊亦未知的確奴才聆悉之下愧憤難
名凡爲臣子罪何以容伏思此次京津之亂所患內外紛乘屢失事機
遂成燎原之勢實爲史冊所罕見如此事起倉卒以致儀仗未備司膳

未隨雖有王大臣及提臣等帶兵隨扈而山徑崎嶇道路遼遠寒暑風雨想像蹕路艱辛不勝馳繫之至奴才時以藩司甫護督篆任重事亟勢難奔赴行在雖飛飭沿途地方官敬謹供奉第恐趕辦不及勢必在在簡陋奴才撫心自問悚疚萬分所幸榮祿於途中截留京餉及鐵路經費等銀飭派陝西臬司升允押解西行以資進用奴才復思御前服用及官兵餉糈度支浩繁自應寬爲籌備當與榮祿崇綺公同電告各省將各項京餉改解山西一帶探明行在確交以期源源接濟無誤要需再奴才不得不苟延殘喘力分危局當與榮祿宋慶商酌將潰勇趕緊收伍及分別資遣並布置獲鹿一帶及留防近省南北各營以冀稍逭臣子之責惟願綸音宣布俾各省疆臣共圖扶維之計早復京師還

廷雍奏請
迅派知兵
大員總統
各軍片

御宸極以慰天下臣民之望奴才雖極愚鈍尤當奮勉効命以期仰副
聖懷所有奴才仰慰下忱理合恭摺由驛五百里馳陳伏乞皇太后皇
上聖鑒再此摺係七月二十八日拜發專差行至良鄉迤北路阻折回
茲由奴才另繕合併聲明謹奏光緒二十六年八月初七日發十二日
奉硃批覽奏具見惻忱仍著慎守封疆整肅吏治以固人心而維大局
並將由直入晉南北各要隘嚴密籌防勿稍疏誤

廷雍片 再保定爲九省咽喉自京城不守前敵各路敗軍陸續紛紛
來省奴才與各統將設法收集不下三十餘營無如均屬狼狽不堪軍
容不整旣多不歸節制自難聽候調遣伏查天津失陷雖屬前督臣裕
祿失於調度亦由各軍不能統歸節制號令不一以致敵人乘虛而入

榮祿奏覆
陳布置直

震及京師現在保省已爲前敵衝要奴才新募振遠軍十營甫及成伍未可恃以折衝雖外來各軍不無久練之師而新遭創敗士氣渙散非得威望素著知兵大員爲之統制難期整理前車之鑒可虞若不以兵力堅持大局益不堪設想奴才受恩深重當此岌岌之際即捐糜踵頂亦所不惜大學士李鴻章北來尙需時日奴才祇能盡分所能爲支持危局現雖極力經營設防每苦難以應手深恐再誤大局合無仰懇天恩迅派知兵大員總統各軍與奴才隨時商辦布置一切以免貽誤大局幸甚謹附片詳陳伏乞聖鑒訓示謹奏奉硃批著即派宋慶接統
十三日 行八十里駐蹕代州之陽明堡

奴才榮祿奏爲恭摺覆陳仰祈聖鑒事竊於光緒二十六年八月初四

晉防務未
能參與和
議摺

日承准軍機大臣字寄七月初五日奉上諭前因英寶使有各使在京和局較易轉圜之語並據函訂王大臣等於十九日往談嗣因軍務倥傯未及前往卽有二十一日之變現在局勢大壞祇此一線可以援爲向議之據著榮祿徐桐崇綺彼此熟商迅速設法辦理是所至盼欽此伏查七月二十一日洋兵攔入京城奴才巷戰未能得手始出西直門收集隊伍冀圖恢復行抵保定省城准輔國公載瀾來函並鈔寄七月二十二日英年口傳諭旨著榮祿徐桐崇綺留京辦事欽此奴才當將出京後籌辦事宜會同崇綺片奏在案茲復欽奉諭旨令奴才等設法辦理查致英寶使函係十六日非十九日也是時大局尙未糜爛寶使覆函於次日九點鐘在館拱候會晤乃該大臣啟秀趙舒翹等恐其扣

留不敢往晤託詞有差不及前往又函覆之至二十日夜間又復遷延遂有二十一日之變現在京城已爲洋兵佔據徐桐不知下落崇綺已於初二日在保定殉節夫事前所謂轉圜者原爲停戰議和保全京師免驚聖駕今都城淪陷變輿西巡百姓遭其荼毒地方爲其蹂躪旣不能維持於事前而欲令補救於亂後奴才非怯也反覆思維刻下非但無從措手更難援爲向議之據昨於護督臣廷雍處見大學士李鴻章來電有不日赴津之語是李鴻章旣奉全權之命一切議和之事均應責成該大學士一手經理奴才忝領師干實難兼顧且自定州以迄獲鹿井陘固關各要隘節節均須設防奴才雖已飭總兵張行志姚旺何得彪等馳往駐紮尤須親到佈置經營防務正所以拱衛行在自難分

身參與和議事有專責非奴才所敢意存推諉聖明在上區區苦衷諒蒙鑒察一俟奴才將沿途防務佈置周密即馳赴行在瞻觀天顏以紓犬馬戀主之忱謹恭摺具奏伏乞皇太后皇上聖鑒謹奏光緒二十六年八月初七日發十三日奉旨寄榮祿來奏已悉該大學士現在督師禦侮乃其專責著毋庸前往獲鹿更不宜亟來行在著仍駐紮保定料理整頓遣散事宜

榮祿奏
書崇綺殉
節片

榮祿片 再七月二十一日黎明逆夷攻犯東華門甚急奴才率領親兵飛馳堵禦將賊擊退後馳赴太和門恭悉皇太后皇上聖駕業已西巡是時戶部尙書崇綺與奴才相遇正擬追隨護從適值東直安定二門已爲敵攻破奴才在交道口一帶率隊竭力迎勦巷戰多時營哨各

官傷亡過半力實不支始偕崇綺一同出城原冀收齊隊伍乘敵不備
卽圖進取以爲恢復之計迨至蘆溝橋良鄉察看敗卒殘勇擁集於途
刻難整理當與董福祥密計至保定復與宋慶密商志圖恢復該提督
等審機度勢僉謂各軍屢挫銳氣銷磨非更有大枝精兵重加整頓恐
難遽議進取尙書崇綺由是益增悲憤八月初一日夜間與奴才熟籌
布置恨不能仰紓國難相對歔歔次日黎明該尙書竟在保定蓮池書
院寓所以衣帶自縊留有親書絕命詞一紙並致奴才一函囑代呈遞
留置案頭奴才患難中如失左臂痛悼莫名當將其身後事宜粗爲料
理第念京城繫陷聖駕西巡奴才忝領師干一息尙存此責未盡不得
不勉支危局矢鞠躬盡瘁之誠而該尙書老成碩學守正不阿猝遭時

變力與心違出於一死其節可重其志可悲奴才目覩情形不忍聽其湮沒理合據實上聞並將該尙書絕命詞一紙恭呈御覽除所致奴才一函另行封送軍機處備查外爲此附片奏聞其應如何賜卹之處恭候聖裁謹奏奉旨禮部尙書崇綺著照尙書例賜卹並加恩予諡

附崇綺絕命詞

恭悉西巡未敢遽死無力恢復以身殉之大清光緒二十六年八月初二日崇綺絕命詞

旨幫辦武衛軍務前四川總督李秉衡七月十七日在通州張家灣殉節雖未據奏報然探聞已確李秉衡著照總督例賜卹並加恩予諡十四日 行八十里駐蹕崞縣之原平鎮

李鴻章等
奏款局急

上諭寄劉坤一前諭調劉永福一軍西來現奉慈輿一路安善着飭該總兵統帶該軍駐紮江南分防海口不必前來

廣東巡撫德壽奏恭聞兩宮西幸謹於京餉外籌銀三十萬兩採辦米石以裕軍糈摺

李廷簫奏據轉運委員惲祖祁稟清江糧臺應否移駐漢口請旨遵行摺奉硃批着李廷簫傳諭惲祖祁轉運俟到太原後再諭

浙江巡撫劉樹堂奏勦平江山常山兩縣土匪並收復兩城情形餘匪竄入江西摺奉旨江山常山縣城現已先後收復着該撫會同江西各軍合力兜勦餘匪江山知縣周緒益等着先行革職

大學士調補直隸總督臣李鴻章南洋大臣兩江總督臣劉坤一湖廣

宜挽救不
可再失事
機摺

總督臣張之洞奏爲款局急宜挽救不可再失事機會同恭摺密陳仰
祈聖鑒事竊自七月十六日以後臣鴻章遵旨屢向各國電商先行停
戰距洋兵入京僅止數日深恨無可挽救七月二十一日以後復以停
戰撤兵分電切商各國皆以剿匪弭釁各節中國未能照行兩宮離京
情形迥異設詞推延未允各派全權議事但事機愈緊豈容坐待迭與
各駐使等再三設法探討冀有轉機仍一面將局勢危變情形於八月
初一日專摺馳陳並電由護陝西撫臣端方就近代奏恭待後命初六
日接駐俄使臣楊儒電稱自聞洋兵內犯車駕蒙塵心膽俱裂連日奔
走外戶兩部力籌挽救均稱事已至此實乏良策刻下北京無主各武
員便宜行事勢難遙制蓋因屢次代我設謀均未照辦不免怏怏之意

嗣經迭次懇商並告以我深知中俄邦交有逾歐美無如華洋各報議論均言俄心叵測隱圖中國我亦惡之此次進兵本爲救使今已保全俄兵何妨先撤以作榜樣全兩國數百年交誼慰中國數百萬人心以示實憑而箝衆口反復勸解彼意稍動始允設法轉奏頃據面告俄主已允即日將兵隊公使人民一併撤至天津以示真心見好至東省之事有鐵路公司承當將帥請中國自辦俄決不據尺寸土地飭詳告貴大臣此係勉副臣鴻章與臣儒再三之請切勿誤爲畏怯一面望速請皇太后皇上回京或先迅派合例全權議事遲則恐德國統帥到華別有舉動並請臣鴻章與南省督撫之負民望者合奏辦理等語查戶部微特辦事明決肝膽照人俄主言聽計從外部不能掣肘此絕大轉機

不可再誤倘各國均肯照辦京師必須妥籌鎮守萬一民變復作子黎更遭塗炭且又予人以可乘之機不可不慮乞轉電臣坤一臣之洞等通籌迅速奏辦等語臣又先接俄戶部徵特七月二十一日二十九日兩電另單鈔呈御覽內稱各大員之擾亂大局者應請懲罰不貸而於東三省違旨肇亂各官請嚴查懲辦不可以空言虛語塞責均係忠告之言臣鴻章卽與臣坤一臣之洞往返電商撤兵須有實約議事難託空言查西例國君不在京便是無主之國任敵兵施威故必有留守便宜行事之全權大臣方能督辦和局今俄國請先迅派合例全權議事遲則恐德統帥到華別有舉動是爲目前第一要義臣鴻章前據日本所請奏懇飭令慶親王奕劻大學士榮祿星夜回京會議此實萬不可

緩之舉如蒙俞允臣鴻章卽當偕乘俄艦航海先赴天津專俟慶親王榮祿回京便可催各國派使會議蓋俄所允撤兵到津恐尙須會商各國而後定就使俄兵首先退至天津市義於我而我若仍以空言搪塞彼兵在津何難再進或稍遲疑不決轉瞬八月杪德帥卽統陸兵兩萬而至德旣不能撤回勢必攪亂各省愈鬧愈壞不可收拾恐德倡而俄隨德俄倡而諸國隨如上年膠州澳爲先旅順大連灣繼之威海衛廣州灣又繼之其前鑒也抑臣等又有請者攻使縱匪聯軍所以由天津犯京此各國公同向我理論之事也各使幸已無恙若能如鴻章所請勦匪之事責成直隸督臣可示以踐行之漸至毀路開釁俄兵所以佔據東三省諸城此俄國專案向我理論之事也黑龍江將軍壽山署奉

天副都統晉昌該二員壹意主戰豈不知三省兵械斷不足以抗大敵
乃忽縱匪毀路另構釁端以致失陷多城殃害人民貽國家無窮之累
其肇禍尤屬重大非另簡相當人員前往接替終難停師擬請聖明以
大局爲重即將壽山晉昌先行罷斥治罪以爲開釁僨事者戒庶使款
局漸可轉圜不致遷延再蹈覆轍臣等爲事機不可再失起見謹合詞
據實瀝陳繕摺由驛六百里加緊馳奏仍電屬護理陝西撫臣端方另
行代爲繕摺就近轉遞以期迅速是否有當伏乞皇太后皇上聖鑒訓
示謹奏光緒二十六年八月初十日發十四日奉旨

李鴻章等片 再正在繕奏時接保定廷雍轉遞光緒二十六年七月
二十五日奉上諭七月二十一日洋兵猛攻入城圍撲宮禁勢甚危險

李鴻章等
奏請下詔
罪已並添
派王大臣

主持和議
片

不得已恭奉皇太后慈駕暫行西幸此次釁起民教相關朝廷辦理爲難情形已歷次備具國書詳告各國彼方以代除亂民爲辭謂於國家並無他意而似此舉動殊屬不顧邦交未符原議且中國於駐京各使臣始終委曲保全未嘗失禮尤不應如此相待昨已派榮祿徐桐等留京辦事然當各國氣勢方張之際恐在京未能遽與開議該大臣公忠素著平日威望亦爲外人所信服國事至此著卽迅籌辦法或電各國外部或商上海各總領事從中轉圜務期竭盡心力爲國家消此大患等因欽此伏讀之下汗涕交流自古邦交論勢不論理然具此勢足以凌人者仍必執理與人爭論查各國外部轉覆各電及洋報所述駐京各使詞意與諭旨間有不符各使館皆謂兵民圍攻數十日之久幾無

生路德使被戕之後聞尙有荷比兩使受傷初則謂我袒匪不能護使繼則謂我縱兵與匪合而攻使臣到滬以來接見各國總領事等衆口一詞以爲始終未見勦辦拳匪之旨故各國聯軍由天津而入京師且入京師而仍添兵不止皆爲此也臣於請添派王大臣摺內兼請勦辦拳匪實以中國勢力不足強制各國若非理足更無辦法從來城下之盟有越數十年而轉爲強盛者然斷無目前不忍辱而能自全之理日本外部青木電請多派王大臣又請諭旨內須有朝廷引過辭意各國方能開議否則德國所派之大帥瓦爾德將率水陸全軍到華此人曾與毛奇畢斯馬同事位高威重誠恐各國意旨又必加厲傳曰禹湯罪己其興也勃焉竊願朝廷效法禹湯先下罪己之詔能使海內臣民撫

膺而痛哭卽能使域外諸邦心悅而誠服臣鴻章受四朝特達之知今蒙畀以恢復神京重任雖衰邁無能曷敢諉卸惟臣子得効力於折衝俎豆之間仍必仰賴聖主得心應手方免隕越臣一面將此次諭旨轉電各國駐使楊儒等向外部婉轉解說尙恐未能合拍至上海各總領事已晤者曾囑其電商本國均稱伊等無議事之權各國又未肯即派全權前來會議似不得不仍向在京各使設法轉圜諭旨已派榮祿徐桐等留京辦事聞榮祿尙在保定斷不可再使離京但事關重大各國意在添派熟悉洋務之王大臣主持其事否則終恐不能認爲合例全權徒延時日臣一俟稍有轉機卽當航海馳赴津京相機會同商議理合附片據實先行覆陳伏乞聖鑒訓示遵行謹奏

李鴻章等
奏添設電
線並請早
日回鑒片

李鴻章片 再與各國商議事件全賴電線靈通臣鴻章行抵上海卽查明直隸山西兩省電線全行被匪拆毀只得暫駐上海尙可與外洋往來通電現已商由盛宣懷設法借款先將上海至天津另設海線再由天津至上海復設陸線速將晉線次第修復中外樞紐方免阻滯惟畿輔千里主持無人拳匪潰兵充斥焚掠主客各軍概行散漫臣坤一之洞電商臣鴻章以各國議和必非旦夕可結之案旣調任直隸必當自任該省之地主冀可杜外人無主之說所關甚大

臣鴻章卽已電屬護理督臣廷雍代爲繕札蓋用關防通飭本省地方官及本省外省各統領在直隸境內各軍均宜各守法度遇有土匪潰兵滋事卽行認真剿除一俟到津卽當遵旨一面會同添派之王大臣盡力籌議一面將

順直各屬應辦事件勉力自任至鎮守京城尤非慶親王榮祿不能勝任臣鴻章如有可盡之責亦不敢推諉惟斷不能獨任其事但望畿疆稍能安靜兩宮早日回鑾以遂天下臣民之望以慰各國尊敬之誠此臣等日夜所禱祝以求者也再各省人心不靖會匪伏莽時有蠢動兼之康有爲黨羽分布各處造言煽惑尤屬可慮臣坤一之洞聯絡各督撫竭力防維總期隨時撲滅擬懇速頒諭旨飛飭各省將軍督撫言聖駕暫時西幸已派王大臣等與各國妥爲議結各省將軍督撫務須照常辦事鎮靜民心勿令擾亂保守疆土勿稍疏虞於交涉事件仍照迭次諭旨按照條約辦理遇有各種匪徒藉端生事嘯聚焚殺意圖乘機作亂立即派兵勦平勿任滋蔓擾動大局各省官民見此明諭人心自

靖內患自安免致重貽宵旰之憂謹附片具陳伏乞聖鑒謹奏

謹將使俄楊儒譯寄俄戶部大臣微特來電鈔呈御覽

一照鈔駐俄楊使七月馬電俄戶部微特致電譯下中國亂事我皇極願早了事雖至此我皇與貴國暨太后睦誼無損且深信公如故亟盼各國添兵暨德國統帥瓦爾特到華以前先自靖亂運則枝節叢生恃愛勸公早乘我艦赴津我軍當隨處保護一面令各使到津請准我酌定兵數派赴京城外迎接因公須與各使會議若彼不出公宜入都貴大皇帝應嚴飭東三省各將軍停攻保路之俄兵另派曉事全權大臣馳往東省將違旨肇亂各官嚴查懲辦儒馬七月二十一日到

二照鈔駐俄楊使七月艷電勘電遵悉微稱情形至此俟德派瓦統

帥到華定有辦法伊復電錄下時局非空談所可挽轉要當實行耳
凡大員之擾亂大局者太后皇上應懲罰不貸且太后皇上當嚴諭
以後不復攻擊毫無游移至俄國他日之護助請中堂勿疑如閣下
思惟以空言虛語他日決不願踐行者辦理如此重大之事則誤矣
中堂應往北京實力奉行無忽微特押又外部文略稱現中俄交誼
未稍損惟停戰須互商各國辦理俄兵佔東三省各城非俟地方平
靖保無後患未便退兵邊界禍根咎在疆帥兵丁亂民望速遷撤等
語儒艷七月二十九日到

旨寄李鴻章劉坤一張之洞所奏具悉七月二十一日之變罪在朕躬
悔何可及該大學士等與國同休戚力圖挽救宗社有靈實深鑒之所

陳各節皆目前最要機宜奕劻計初十日可以到京本日復有旨加派榮祿會同辦理現在俄戶部允可撤兵是機有可乘不可一誤再誤該大學士應即借乘俄艦駛赴天津先行接印仍即日晉京會商各使迅速開議至罪己之詔業於七月二十六日明降諭旨播告天下該大學士此時當已接到自行勦匪一節該大學士未到任以前已責成廷雍認真辦理亦有明發諭旨矣其餘皆當照請施行惟事有次第不得不略分先後耳朕恭奉慈輿一路安善現距太原兩站駐蹕久暫俟抵太原後體察情形再定進止此次變起倉卒該大學士此行不特安危繫之抑且存亡亦繫之旋乾轉坤匪異人任勉爲其難朕於該大學士等有厚望焉

端方致李鴻章奏請
兩宮回鑾
電

護理陝西巡撫布政使端方謹將李鴻章上海來電請代繕由驛六百里加緊探遞行在軍機處電底呈請鈞鑒

初七日接駐俄楊使歌電俄戶部允可撤兵當即密商日本駐滬總領事電各該外部一體撤兵開議頃據日本總領事小田切轉呈外部電稱該領事往見李中堂探明前請朝廷多派全權大臣之旨意如何曾否照准並密陳李中堂此時可速請兩宮回鑾各國可保無事兩宮回京則有政府可以辦事現在議和已到時候可與各國從速議和等語今日洋報俄已向各國商酌撤兵離京未知各國有無他意即使聯軍移津正宜從速議款應懇聖明即允日本所請派令榮祿先在保定候鴻章津京會議一面添派慶親王迅速回京如能趕在德軍未來之先

開議稍有區別兩宮動靜四海觀聽所屬各國俱請回鑾日本外部已與各國商明可保無事蓋恐王大臣辦事曠日需時京都收復非遙宮闕無恙不久即可迎駕或請暫駐太原再相機回京伏乞聖裁請代奏鴻佳八月十四日到

上諭寄李鴻章本月初三日崑岡與赫德會晤據赫德稱從速派親信大臣議款事可轉圜已即日命奕劻回京辦事該大學士着仍遵前旨來京會同慶親王力挽危局劉坤一張之洞一并函電會商榮祿現辦軍務俟該大學士到津體察情形如何電奏請旨

由六百里加緊交陝撫電寄

軍機大臣字寄慶親王奕劻奉上諭前命該親王星馳回京准其便宜行事計期當早已抵京矣頃據李鴻章電奏俄允撤兵回津爲諸國之

倡該大學士亦不日乘坐俄輪到津接印後即日進京本日復加派榮祿會同該親王李鴻章妥籌商辦著即乘此機會實力實心共挽危局事宜從速夜長夢多不可一誤再誤也原電鈔給閱看將此由六百里諭令知之

上諭前因榮祿奏稱擬俟防務布置妥協即赴行在當經諭令該大學士仍駐保定力固畿輔大局茲據李鴻章迭次電請添派王大臣會辦款議除已命慶親王奕劻星馳回京並與劉坤一張之洞函電互商外即著添派榮祿會同辦理並准其便宜行事該大學士如已赴獲鹿著即迅回保定俟李鴻章到京後妥爲商辦大局所關安危繫之存亡亦繫之該大學士爲國重臣受恩最深當不忍一意藉詞諉卸也李鴻章

原電著鈔給閱看將此由六百里諭令知之

十五日 行八十里駐蹕忻州城

科布多辦事大臣端洵奏山西籌運甘肅糧石勞費太甚請別籌糧運
辦法摺

烏里雅蘇臺將軍連順等奏寧夏購糧請改籌船運摺

戶部左侍郎英年奏查明前站道路並預備太原行宮繪圖貼說恭呈
御覽摺

吏部尙書臣徐郁等奏爲謹陳都城近日情形上慰宸廑恭摺仰祈聖
鑒事竊上月二十日洋兵入城至今十餘日廟社安固禁門以內亦尙
完整城內外居民當洋兵初入時不免驚惶現已漸就安謐市面多有

徐郁等奏
陳洋兵入
城後情形
摺

土匪焚掠之事五城地面各國分段暫駐官弁無從彈壓全權大臣直隸總督李鴻章尙未到京應請飭催迅速北來辦理一切事件除繕摺恭請皇太后皇上聖安外謹將都城近日大概情形合詞馳陳由內務府筆帖式多壽齋詣行在伏乞皇太后皇上聖鑒再京城內外皆有洋兵駐紮內外城臣工難於晤面商榷是以內城諸臣未經會列銜名合併聲明謹奏光緒二十六年八月初六日發十五日奉硃批知道了李廷簫致軍機處現已預備黃轎三乘綠轎二乘來忻州迎駕函十六日 行六十里駐蹕陽曲縣之黃土寨

榮祿奏抵獲鹿後布置防務情形摺

旨寄劉坤一所有張春發陳澤霖兩軍現回江南著該督派妥慎大員

前往認真淘汰點驗明確收集成軍再行給餉

上諭朕此次恭奉鑾輿暫幸太原已派榮祿等充留京辦事大臣復令慶親王奕劻會同李鴻章與各國議和辦理一切事宜此案初起義和團實爲肇禍之由今欲拔本塞源非痛加勦除不可直隸地方義和團蔓延尤甚李鴻章未到任以前廷雍責無旁貸即著該護督督飭地方文武嚴行查辦務淨根株倘仍有結黨橫行目無官長甚至抗拒官兵者卽責成帶兵官實力勦辦以安氓庶而靖亂源

上諭慶親王奕劻大學士李鴻章榮祿均著授爲全權大臣便宜行事劉坤一張之洞著會辦議約事宜均准便宜行事

十七日 行六十里駐蹕太原府城

四川總督奎俊奏聞聖駕西巡分遣提督夏毓秀總兵丁槐帶兵入衛摺

兩湖總督張之洞湖北巡撫于蔭霖奏現聖駕西巡謹籌糧運辦法摺
旨寄禮親王世鐸等著迅赴行在

山東巡撫袁世凱奏派員解餉上供行在度支摺奉硃批運解各餉即著迅赴行在以備供支

又奏請設法向西商籌借餉需由各省按期分還片奉硃批所請事多窒礙應毋庸議

李鴻章電奏連日與俄使商請各國公使先行撤兵徐議約款各使函覆要以二事一請兩宮回鑾一請懲辦禍首端王莊王剛毅趙舒翹英

年毓賢等六人如允照行方准開議俄使復請派員交收東三省事關重大伏乞聖斷施行由陝撫遞至行在

旨電李鴻章據該大學士奏請嚴辦端親王等六人及派員交收東三省兩節均係題中應有之義惟此時奕劻在京尙未知開議與否該大學士亦尙未進京遽有此旨不免未同而言著仍遵前旨迅速到京會同奕劻榮祿商辦開議俟議有頭緒卽行電奏候旨核示

六百里交陝撫發電

上諭壽山著開缺聽候查辦黑龍江將軍著延茂補授未到任以前著薩保暫行署理

上諭晉昌著開缺聽候查辦盛京副都統著訥欽補授

上諭增祺著調補江寧將軍盛京將軍著崇善補授未到任以前著清

銳署理

旨寄奎俊張之洞著奎俊傳諭夏毓秀速來山西陞見即統所部五營
迅赴行在著張之洞催丁鴻臣統帶所部速來山西

旨寄榮祿董福祥所有保定以西甘軍著歸董福祥節制在獲鹿正定
固關一帶扼紮一切營規務須加意整頓榮祿著毋庸接統

旨寄馬玉崑現在武衛左軍業經全歸該提督接統所有一切軍事仍
須稟承宋慶籌商辦法後路各軍如有滋擾情事定惟該提督是問

十八日 駐蹕太原府城

奴才榮祿奏爲遵旨折回保定恭摺覆陳仰祈聖鑒事竊奴才於十六
日卯刻在平定州拜發前摺午刻至銅石驛途次奉到軍機處六百里

榮祿奏遵
旨馳回保
定會辦議
款摺

廷寄內開光緒二十六年八月十四日奉上諭前因榮祿奏稱擬俟防務佈置妥協即赴行在當經諭令該大學士仍駐保定力顧畿輔大局茲據李鴻章迭次電請添派王大臣會辦款議除已命慶親王奕劻星馳回京並與劉坤一張之洞函電互商外即著添派榮祿會同辦理並准其便宜行事該大學士如已赴獲鹿著即迅回保定俟李鴻章到津後妥爲商辦大局所關安危繫之存亡亦繫之該大學士爲國重臣受恩最深當不忍一意藉詞諉卸也李鴻章原電併鈔給閱看將此由六百里諭令知之欽此奴才跪誦之餘曷勝惶悚奴才昨於十五日在西天門途次接奉廷寄令奴才仍駐保定調度一切惟因是日已馳至平定州相距太原僅止三站故仰懇天恩准奴才馳赴省城恭聆訓誨俾

遂瞻依之忱再馳回保定亦不致多延時日茲復奉旨添派奴才與奕
劼李鴻章等會辦款議夫事權輕重自應先其所急但奴才知識庸愚
曷能擔此重任惟當此國家安危所繫大局攸關之際奴才世受國恩
何敢畏難諉卸且奴才仰蒙皇太后皇上恩遇之隆天高地厚雖粉身
碎骨亦難仰報於萬一惟有竭盡愚誠與奕劼李鴻章等悉心籌畫妥
慎辦理但能釋彼族一分要挾則國家或可少一分艱窘斷不敢因循
退避有負生成奴才於拜摺後迅即折回平定州馳赴保定以期與奕
劼李鴻章等會商辦理以紓廛系所有奴才遵旨馳回保定各緣由謹
恭摺覆陳伏乞皇太后皇上聖鑒謹奏光緒二十六年八月十六日發
十八日奉硃批知道了

詔免山西天鎮等州縣蹕路所經地方本年錢糧

護理陝西巡撫布政使端方奏陝西荒旱請開辦賑捐摺奉硃批依議
又奏遵旨安置教士教民情形摺

旨寄端方着查明所有蹕路饘頓經過直隸山西廟宇及紳民人家開
單呈送軍機處候旨

十九日 駐蹕太原府城

上諭朕欽奉慈禧端佑康頤昭豫莊誠壽恭欽獻崇熙皇太后慈輿暫
時西巡所有與各國應議事件已派王大臣等妥爲商辦各省將軍督
撫務當照常辦事鎮靜民心勿令擾亂保守疆土勿稍疏虞交涉事件
仍遵疊次諭旨按照條約辦理倘有各種匪徒藉端生事嘯聚焚殺意

李鴻章奏
款局須速
開議遲則
生變電

圖乘機作亂着即派兵立即勦平勿令滋蔓擾亂大局各該將軍督撫受恩深重自當共濟艱難消弭隱患用副朝廷諄諄誥誡之至意

上諭寄各直省將軍督撫所有與各國應議事件現已派慶親王奕劻大學士李鴻章榮祿與各國使臣會議各該將軍督撫亦宜共抒忠憤宏濟艱難剴切敷陳以資補救

李鴻章電奏頃抵天津接江鄂魯皖各督撫電稱款局須從速開議遲則生變目前要義數端一俄允撤兵雖空言然致謝亦空言無妨以此羈縻並託其勸德主勿懷戕使之嫌二屢聞德有窺海州向江北之意李盛鐸電亦有此說善聯電據廈門英領事云宜趁此德隊未全到先請旨將德克使優卹即知照德新使及聯軍藉以紓禍三各國謂和局

不定聯軍必西進無論遠近皆當深入現已有攻保定之說宜早商停戰免致不可收拾四日本有言若有真心悔過諭旨即不回鑾亦可開議二十一日會奏即是請皇上發此諭旨照此辦法可緩回鑾總之無切實辦法各國難允開議不開議即不停戰事機萬緊伏乞聖裁又盛宣懷電頃德使面談華人戕我使臣故與各國意見不同奉德主訓條若非交出四兇不准停戰開議再四與商乃云惟有中國大皇帝親電德主將被害使臣切實惋惜或稍可挽回答以六月國書已惋惜伊云措辭輕率且非專命現在此著係我私語如此電能得體要我主可息怒有轉機云云與英領事告善聯意同若朝廷准發國電由軍機處電滬代轉呂使交德穆使代遞必得達彼國謂兵戕已有實據前國書諉

端方致李
鴻章報使
請回鑾電

爲亂民所害彼決不允鴻章過大沽晤俄水師提督云除留兵千數百
名守禁城外現已撤回五千似宜有國書道謝東三省俄廷未令停戰
彼尙擬分攻瀋陽力勸暫緩德兵攻陷房山亦有圖保定意若奉國電
特旨卹克使並將臣等二十一日會奏宣明以冀早日開議聞德員在
京拿獲戕德使之旗兵供認不諱旨意措辭宜斟酌

護理陝西巡撫布政使端方謹將大學士調任直隸總督李鴻章上海
來電由六百里夾板加緊飛遞行在軍機處

頃又接駐俄楊使元電請轉奏此次俄首先撤兵實非意料所及聞各
國除英德稍有意見外餘均以撤兵爲然或將效法緣和議一日不定
卽商務一日受虧此各國所最注意者也然欲和議速定必須兩宮在

京全權各大臣方可面稟機宜安速了結否則長途電奏必多遷延窒礙仍恐決裂伏乞皇太后皇上熟審利害即日回鑾上慰列聖在天之靈下敷中外臣民之望如蒙俞允請速發俄主謝書並懇排解由儒力求設法向各國婉說轉圜可冀順手至乘輿所蒞各國決不驚動車塵致誤和局從此京師鎮定和議告成宗社幸甚萬民幸甚時危勢迫冒死上陳等語事關緊急不及繕摺乞速代奏八月十九日奉旨電李鴻章轉楊儒電悉俄撤兵尙係空言俟見諸實事自當致謝再奕劻計到京多日該大學士何以尙未成行著速報起程日期爲盼

二十日 駐蹕太原府城自本日始內外摺件始親奉硃批督辦糧臺岑春煊奏請委員分催江浙兩湖的餉摺奉硃批依議

廷雍奏拳
教相仇現
復各聚請
旨嚴飭一
律解散摺

二十一日 駐蹕太原府城

暫護直隸總督布政使奴才覺羅廷雍奏爲拳教相仇釀成大變現在
仍復各聚請旨嚴飭一律解散並分別先後辦法恭摺仰祈聖鑒事竊
查自西人傳教以來凡入教之徒多係無賴倚恃洋教欺凌平民積數
十年怨毒人人正思報復適有義和拳以仇教爲名鄉愚羣相依附始
自山東繼延直境互相燒殺抄搶遂成固結不解之仇伏讀本年五月
初十日上諭各省教堂林立教民繁多遂有不逞之徒混迹其間欺壓
平民武斷鄉里州縣遇有民教涉訟未能悉心考查妥爲辦理致使積
怨已深民教互仇遂有拳民以仇教爲名倡立團會再有好民會匪附
入其中藉端滋擾拆毀鐵路焚燒教堂直與國家爲難應卽一齊解散

若再執迷不悟即係叛民一經大兵勦捕家敗身亡後悔何及等因欽此欽遵當經通飭在案惟查教民久以洋人爲主近日百姓又以拳匪爲歸視王法如弁髦以官長爲無用豈止三令五申無如罔知利害拳民恃衆逼迫教民皆圖負隅而拳民每攻必敗立見傷亡直至外畔已開該拳民明知不能制敵而仍復妖言惑衆藉端肇亂渙散軍心種種要挾需索惟利是圖並將天津局庫快利鎗礮搶奪一空紛紛飽載而去各軍轉乏軍火以致津陷引敵入室長驅北犯神京不守乘輿西巡薄海臣民無不痛心疾首切齒拳民者也論此次之變隱患雖由於教民亂萌實起於拳民按教民負隅居然化外旣爲隱憂而拳民亦復聚衆擾害地方勒索財物欺侮官商屢據各該地方官紛紛稟報情形日

甚一日證諸案據實有不容不勦辦之勢如交河齊家堰搶劫富商船隻三起殺害一百數十命其容城新城交界之白溝河靜海之獨流鎮文安之勝芳蘇橋一帶均爲拳匪巢穴動聚數萬人廣有快鎗斂捐糧草水旱各路盤詰來往輕則劫留財物甚則人命草菅廣平府前有拳匪攻襲郡城幸經地方文武嚴密籌防日前軍火運至河間府拳匪圍城意圖搶劫已派營隊星夜馳護相機辦理其餘各處拳民衆寡不一旋散旋聚糧賦差徭一概抗停凡事不容地方官作主以上種種悖逆情形不堪枚舉如此紀綱王法何存於政治人心大有關礙若不痛加懲創勢必各據一方更難收拾矣惟念拳匪迫脅若不分別首從未免玉石俱焚亦非仰體聖主好生之德擬請旨揭其拳教各罪狀飭下直

隸各路統兵大員先將凡有聚集拳民處所勒令繳呈軍械尅日解散
歸業既往不咎倘敢抗違即是叛逆亟應勦除經此明詔凡拳民有業
可歸舊從者勢必各散安度其仍復相持者必係巨盜逃兵自應盪平
拳民既無教民如再不散亦照拳民一律辦理以昭公允並請旨飭下
全權大臣李鴻章豫爲照會英法美三國公使責令該教堂洋教士勿
任教民聚集教堂致招匪類生心難於保護應即解散以免再生衅端
以上分別辦法如蒙俞允不特拳教各民保全實多順直全境蒼生幸
甚大局幸甚所有內亂未定亟須廓清各緣由是否有當謹繕摺由六
百里馳陳伏乞皇太后皇上聖鑒訓示謹奏光緒二十六年八月二十
一日奉旨此次禍端肇自拳匪疊經降旨痛加剗除猶敢在交河等處

嘯聚作亂着廷雍督率呂本元等及地方文武官員分別勦除

旨寄端方朕巡幸陝西尙未定期行宮一切着先行預備無事華飾

董福祥奏前奉諭旨督帶馬隊西來所有各營步隊現皆駐紮保定至獲鹿一帶潰散之後行伍既不整齊器械亦多殘缺現在湘淮各軍填紮各處要隘足敷布置擬將臣部步隊悉數調至晉省近郊駐紮整頓操練以資拱衛摺

旨寄董福祥覽奏悉甘軍多有散失器械亦復不全自應逐一清釐重整軍威惟所請全行調集近郊整頓則該軍分紮處所頓形空虛殊未妥協所有獲鹿并陘固關各要隘着責成該提督認真扼紮毋稍疏虞其應行整頓隊伍祇可更番抽調分別淘汰募補未便全行調集該提

督聲威素著當此時事艱難務須殫竭血誠實力振作用備緩急

二十二日 駐蹕太原府城

毓賢奏籲請陛見面陳事宜摺奉硃批毋庸來見

又奏請添派重兵扼守保定以固直隸全局片

閩浙總督許應騤奏閩省援軍順道江山勦匪遵飭兼程入衛摺奉硃批知道了

旨寄榮祿廷雍敵情叵測仍宜嚴防良鄉一帶須節節布置著榮祿廷雍會商辦理

旨寄劉坤一據鹿傳霖面奏駐紮淮徐張春發陳澤霖兩軍陳軍係由蘇撫籌餉鹿傳霖在蘇撫任內已撥出六十萬兩解存清淮道庫以便

按月給發張軍餉項係由江寧庫項撥給現在兩軍仍由直隸回駐淮徐潰敗之餘十亡五六陳澤霖全不知兵張春發聞尙善戰應飭劉坤一派大員前往查點汰弱留強毋令虛糜帑項等語著該督遴委妥員前往挑選如有員弁冒支餉項卽行嚴叅究辦

二十三日 駐蹕太原府城

連順那木濟勒奏東邊鄰衅已開請調勁兵以固疆圉摺

旨寄連順等現在京師拳匪肇禍與東三省無涉俄人奪取呼倫貝爾實自壽山開衅已有旨開缺聽候部議該將軍但就三札兩盟認真訓練以固邊防萬勿連兵挑釁

上諭此次京師之變釁端肇自拳民而教民因而疑懼以致兩不相下

擾攘非常要之拳民教民皆屬朝廷赤子教民苟各安本分各該督撫自能一體保護拳民無知或被拳匪誘惑借端思逞亦何忍不分良莠概予誅夷着各該督撫飭令地方官勸導解散歸農倘仍糾衆肆行亦即重懲不貸

西巡大事記卷一終